



Број/Број: 03/1-50-1-7-38/09
Сарајево/Сарајево, 18.5.2009.године

Z A P I S N I K

38. sjednice Zajedničke komisije za odbranu i sigurnost BiH Parlamentarne skupštine BiH, održane 18. 5. 2009., u vremenu od 9 do 10,30 sati

Sjednici su prisustvovali sljedeći članovi Zajedničke komisije: Brako Zrno, Šefik Džaferović, Slobodan Šaraba, Vinko Zorić, Jozo Križanović, Ivo Miro Jović, Mirko Okolić i Adem Huskić.

Sjednici nisu prisustvovali: Drago Kalabić, Hazim Rančić, Dušanka Majkić i Sulejman Tihiić.

Sjednici su prisustvovali i gosti, predstavnici medija, kao i predstavnici Sekretarijata Parlamentarne skupštine BiH:

- Ljubomir Kuravica, Ministarstvo sigurnosti BiH,
- Sanela Safić, Ministarstvo pravde BiH,
- Vinko Dumančić, Granična policija BiH,
- Jasna Dragičević, Misija OSCE-a u BiH,
- Lejla Hadžihasanović, Štab NATO-a Sarajevo,
- Igor Petković, savjetnik zamjenice predsjedavajućeg Doma naroda PSBiH,
- Zoran Brkić, Sektor za odnose s javnošću PSBiH,
- Dragica Hinić, sekretar, Željko Grubešić, stručni savjetnik, i Jovica Katić, stručni saradnik u Zajedničkoj komisiji za odbranu i sigurnost BiH.

Sjednicom je predsjedavao **Branko Zrno**, predsjedavajući Zajedničke komisije za odbranu i sigurnost BiH. Članove Zajedničke komisije upoznao je s predloženim dnevnim redom i predložio da se u dnevni red, u okviru tekućih pitanja, uvrsti i razmatranje poziva Ministarstva odbrane BiH za učešće u radu Trećeg seminara Vojnoobavještajnog roda OSBiH „Asimetrične prijetnje Balkanu“, te na prijedlog Slobodana Šarabe, zahtjev za cjelovito informiranje Zajedničke komisije o učešću pripadnika OSBiH u vojnim vježbama NATO-a, s posebnim osvrtom na vojne vježbe u Gruziji. Članovi Komisije prihvatili su jednoglasno predložene dopune dnevnog reda, te je konstatirano da 38. sjednica Zajedničke komisije za odbranu i sigurnost ima sljedeći

DNEVNI RED

1. Usvajanje Zapisnika 37. sjednice Zajedničke komisije;

2. Razmatranje Prijedloga zakona o izmjenama i dopunama Zakona o odbrani BiH, prva komisijska faza (predlagač: Vijeće ministara BiH);
3. Razmatranje Prijedloga zakona o izmjenama i dopunama Zakona o Državnoj agenciji za istrage i zaštitu, druga komisijska faza (predlagač: Vijeće ministara BiH);
4. Razmatranje Prijedloga zakona o izmjenama i dopunama Zakona o Graničnoj policiji BiH, druga komisijska faza (predlagač: Vijeće ministara BiH);
5. Razmatranje Programa tranzicije i zbrinjavanja otpuštenog personala Ministarstva odbrane BiH i Oružanih snaga BiH „Perspektiva“ (sačinilac: Ministarstvo odbrane BiH);
6. Razmatranje Informacije o pripremi vježbe „Združeni napor 2009.“, Banja Luka (sačinilac: Ministarstvo odbrane BiH);
7. a) Informacija o stanju sigurnosti u BiH u 2008. godini sa oznakom „INTERNO“ (sačinilac: Vijeće ministara BiH - obrađivač Ministarstvo sigurnosti BiH);
b) Informacija u vezi s realiziranjem Zaključaka donesenih povodom rasprave o Informaciji o aktuelnoj sigurnosnoj situaciji u BiH s posebnim osvrtom na terorizam na 41. sjednici Predstavničkog doma PSBiH (sačinilac: Ministarstvo pravde BiH);
8. Realiziranje Zaključaka sa 37. sjednice Zajedničke komisije za odbranu i sigurnost povodom događaja vezanog za nasilničko ponašanje u dvorištu Suda BiH 21.4.2009. (sačinilac: Ministarstvo pravde BiH, Ministarstvo sigurnosti BiH, VSTV);
9. Informacija u vezi sa Inicijativom Zajedničke komisije za odbranu i sigurnost BiH s 35. sjednice o pitanjima vezanim za granični prijelaz Klobuk-Zubci /Trebinje/ (sačinilci: Uprava za indirektno oprezivanje, Vijeće ministara BiH, Ministarstvo sigurnosti BiH, Granična policija BiH);
10. a) Dopis Ambasade IR Irana u BiH u vezi s djelovanjem terorističke organizacije;
b) Informacija o sastanku s gosp. Ali Nasserom Sobhanipourom, zamjenikom ambasadora IR Iran, održanom 8. 5. 2009.
11. Tekuća pitanja:
 - a) Informacija o održanom 70. NATO Rose-Roth seminaru, Sarajevo, od 19. do 21.3.2009;
 - b) Izvještaj s parlamentarnog seminara „Vize i upravljanje granicama“, 31.3. i 1.4.2009., Brisel;
 - c) Informacija o učešću u programu „NATO Tour“, Brisel, od 19. do 23.2009.;
 - d) Poziv za učešće na Konferenciji parlamentarnih tijela za nadzor nad radom obavještajno-sigurnosnih službi Jugoistočne Evrope, od 25. do 27.5.2009., Sarajevo;
 - e) Poziv Misije OSCE-a u BiH za učešće na „Strateškom vojno-političkom seminaru“, od 12. do 16.10.2009., Sarajevo;
 - f) Molba OSCE-a i Ministarstva sigurnosti BiH za organiziranje prezentacije rada Zajedničke komisije za odbranu i sigurnost BiH učesnicima kursa u oblasti Sigurnosne politike BiH, 19.5.2009., Sarajevo;
 - g) Poziv za Treći seminar Vojnoobavještajnog roda OSBiH „Asimetrične prijetnje Balkanu“, Sarajevo, od 25. do 28. 5. 2009.;
 - h) Prijedlog za informiranje Zajedničke komisije o učešću pripadnika OSBiH u vojnim vježbama NATO-a, s posebnim osvrtom na vojne vježbe u Gruziji.

Ad. 1. Usvajanje Zapisnika 37. sjednice Zajedničke komisije

Članovi Zajedničke komisije su jednoglasno, s osam glasova „za“, usvojili Zapisnik 37. sjednice.

Ad. 2. Razmatranje Prijedloga zakona o izmjenama i dopunama Zakona o odbrani BiH – prva komisijska faza (predlagač: Vijeće ministara BiH)

Branko Zrno informirao je prisutne da Komisija razmatra principe Prijedloga zakona i otvorio raspravu.

Kako nije vođena rasprava o principima ovog prijedloga zakona, Komisija se izjasnila o njemu u prvoj komisijskoj fazi.

Odlučivanje u prvoj komisijskoj fazi

Članovi Zajedničke komisije jednoglasno su, sa osam glasova „za“, prihvatili principe Prijedloga zakona o izmjenama i dopunama Zakona o odbrani BiH i uputili Mišljenje u daljnju zakonodavnu proceduru.

Ad. 3. Razmatranje Prijedloga zakona o izmjenama i dopunama Zakona o Državnoj agenciji za istrage i zaštitu, druga komisijska faza (predlagač: Vijeće ministara BiH)

Branko Zrno informirao je prisutne da Komisija razmatra Prijedlog zakona u drugoj komisijskoj fazi, te naglasio da su amandmane na ovaj zakon podnijeli Sefer Halilović - četiri amandmana, Šefik Džaferović – osam amandmana i Hazim Rančić – osam amandmana. Potom je otvorio raspravu.

Šefik Džaferović naveo je da su amandmani čiji je predlagač identični s amandmanima Hazima Rančića, te predložio da se Komisija istovremeno prilikom glasanja izjašnjava o ovim amandmanima. Naglasio je da je suština amandmana sadržana u harmonizaciji važećeg Zakona o SIPA-i sa zakonima kojima je izvršena reforma policijskih struktura u BiH.

Ljubomir Kuravica, predstavnik Ministarstva sigurnosti BiH, u ime predlagača Zakona, izjasnio se o podnesenim amandmanima na Prijedlog zakona, konstatirajući da su amandmani koje su u identičnom tekstu podnijeli Šefik Džaferović i Hazim Rančić prihvatljivi, dok je amandmane Sefera Halilovića ocijenio neprihvatljivim.

Odlučivanje u drugoj komisijskoj fazi

Komisija se potom izjasnila prvo o amandmanima koje je na Prijedlog zakona podnio Sefer Halilović, a zatim i istovremeno o amandmanima koje su u identičnom tekstu podnijeli Šefik Džaferović i Hazim Rančić.

S pet glasova „protiv“, tri „suzdržana“ glasa i bez glasova „za“, Komisija nije prihvatila četiri amandmana Sefera Halilovića.

S pet glasova „za“, jednim glasom „protiv“ i tri „suzdržana“ glasa, uz postojanje proste većine glasova, ali bez glasova „za“ predstavnika iz srpskog naroda, Komisija nije usvojila osam amandmana Šefika Džaferovića i Hazima Rančića.

Potom su se članovi Komisije izjasnili o Prijedlogu zakona u cjelini.

Sa sedam glasova „za“, jednim „suzdržanim“ glasom i bez glasova „protiv“, Zajednička komisija je u drugoj komisijskoj fazi usvojila Prijedlog zakona o izmjenama i dopunama Zakona o Državnoj agenciji za istrage i zaštitu i uputila ga u daljnju zakonodavnu proceduru.

Ad. 4. Razmatranje Prijedloga zakona o izmjenama i dopunama Zakona o Graničnoj policiji BiH-druga komisijska faza (predlagač: Vijeće ministara BiH)

Branko Zrno istakao je da Komisija razmatra Prijedlog zakona u drugoj komisijskoj fazi, te naveo da su amandmane na ovaj Zakon podnijeli Ivo Miro Jović – tri amandmana, Šefik Džaferović – dva amandmana i Hazim Rančić – dva amandmana. Potom je otvorio raspravu o podnesenim amandmanima i Prijedlogu zakona u cjelini.

Šefik Džaferović je, kao i kod prethodne tačke, naveo da su amandmani čiji je predlagač identični s amandmanima Hazima Rančića, te predložio da se Komisija istovremeno prilikom glasanja izjašnjava o ovim amandmanima. Obrazlažući amandmane, naveo je da njihov cilj, kao i kod amandmana podnesenih na Prijedlog zakona o kojem je raspravljano u prethodnoj tački dnevnog reda, usklađivanje važećeg Zakona o Graničnoj policiji sa zakonima kojima je izvršena reforma policijskih struktura u BiH. Nakon rasprave o amandmanima, istakao je da se na oba prijedloga zakona koja su na dnevnom redu treba isto gledati, te da amandmani treba da budu prihvaćeni.

Vinko Dumančić, direktor Granične policije BiH, podržao je amandman 2. koji je na Prijedlog zakona podnio Ivo Miro Jović, navodeći da član 10. na koji se amandman odnosi nije dobro urađen, čime je njemu, kao direktoru GPBiH, oduzeto ovlaštenje nabavke bilo koje opreme mimo one standardizirane, iako za to ima budžetska sredstva na raspolaganju. Ako ovaj amandman ne bude prihvaćen, doći će do blokade rada njegove Agencije, jer on neće moći nabaviti ni obični kancelarijski materijal bez saglasnosti ministra.

Ljubomir Kuravica naveo je da amandmani podneseni na Prijedlog zakona zadovoljavaju predlagača. Kratko je pojasnio zadatke Agencije za podršku policijskoj strukturi u smislu sačinjavanja liste standardizirane opreme, koja je bila predmet ovih amandmana.

Odlučivanje u drugoj komisijskoj fazi

Komisija se potom izjasnila prvo o amandmanima koje su na Prijedlog zakona u istom tekstu podnijeli Šefik Džaferović i Hazim Rančić, a zatim i o amandmanima koje je podnio Ivo Miro Jović.

S četiri glasa „za“, jednim glasom „protiv“ i tri „suzdržana“ glasa, uz postojanje proste većine, ali bez glasova „za“ predstavnika iz srpskog naroda, Komisija nije usvojila dva amandmana Šefika Džaferovića i Hazima Rančića.

S četiri glasa „za“, četiri „suzdržana“ glasa i bez glasova „protiv“, uz postojanje proste većine, ali bez glasova „za“ predstavnika iz bošnjačkog naroda, Komisija nije usvojila tri amandmana Ive Mire Jovića.

Potom se Komisija izjasnila o Prijedlogu zakona u cjelini.

Sa sedam glasova „za“, jednim glasom „protiv“ i bez „suzdržanih“ glasova, Zajednička komisija je u drugoj komisijskoj fazi usvojila Prijedlog zakona o izmjenama i dopunama Zakona o Graničnoj policiji BiH i uputila ga u daljnju zakonodavnu proceduru.

Ad. 5. Razmatranje Programa tranzicije i zbrinjavanja otpuštenog personala Ministarstva odbrane BiH i Oružanih snaga BiH „Perspektiva“ (sačinilac: Ministarstvo odbrane BiH)

Branko Zrno konstatirao je da je članovima Komisije o ovoj tački dostavljen adekvatan materijal iz Ministarstva odbrane BiH, kao i mišljenje Sekretarijata Zajedničke komisije za odbranu i sigurnost o Programu tranzicije i zbrinjavanja otpuštenog personala MOBiH i OSBiH. Također je naveo da sjednici ne prisustvuje niko od predstavnika Ministarstva odbrane BiH. Potom je otvorio raspravu o ovoj tački.

Slobodan Šaraba izrazio je žaljenje što na sjednici nisu prisutni predstavnici Ministarstva odbrane BiH. S obzirom na tu činjenicu, kao i na važnost ovog pitanja, predložio je da se rasprava o ovoj tački odgodi do naredne sjednice Komisije, na kojoj bi prioritet bio dat razmatranju upravo ovog materijala. Također je sugerirao da se do te sjednice postojeći materijal dopuni s informacijama iz kojih će biti vidljivo šta je do sada urađeno kada je zbrinjavanje otpuštenog personala u pitanju.

Članovi Zajedničke komisije potom su jednoglasno, sa osam glasova „za“, prihvatili prijedlog Slobodana Šarabe, čime je rasprava o ovoj tački dnevnog reda odgođena za narednu sjednicu, do koje će Ministarstvo odbrane BiH trebati dopuniti dostavljeni Program informacijom šta je do sada urađeno kada je u pitanju zbrinjavanje otpuštenog personala.

Ad. 6. Razmatranje Informacije o pripremi vježbe „Združeni napor 2009.“, Banja Luka (sačinilac: Ministarstvo odbrane BiH)

Branko Zrno u uvodnim napomenama naveo je da Informacija predstavlja redovno informiranje Zajedničke komisije od Ministarstva odbrane BiH o aktivnostima vezanim za pripremu vježbe „Združeni napor 2009.“

Kako nije vođena daljnja rasprava, Komisija je ovu informaciju primila k znanju.

**Ad. 7. a) Informacija o stanju sigurnosti u BiH u 2008. godini sa oznakom „INTERNO“ (sačinilac: Vijeće ministara BiH - obrađivač Ministarstvo sigurnosti BiH);
b) Informacija u vezi s realiziranjem Zaključaka donesenih povodom rasprave o Informaciji o aktuelnoj sigurnosnoj situaciji u BiH s posebnim osvrtom na terorizam na 41. sjednici Predstavničkog doma PSBiH (sačinilac: Ministarstvo pravde BiH)**

Dragica Hinić upoznala je prisutne da je Zajednička komisija zatražila od podnosioca ove informacije da pokrene aktivnosti kako bi se skinula oznaka zaštite tajnosti podataka „INTERNO“, ali da do održavanja ove sjednice nije dostavljena informacija da li je to učinjeno.

Zajednička komisija potom je jednoglasno, sa osam glasova „za“, odlučila da raspravu o obje informacije u okviru ove tačke dnevnog reda odgodi za narednu sjednicu.

Ad. 8. Realiziranje Zaključaka sa 37. sjednice Zajedničke komisije za odbranu i sigurnost povodom događaja vezanog za nasilničko ponašanje u dvorištu Suda BiH 21.4.2009. (sačinilac: Ministarstvo pravde BiH, Ministarstvo sigurnosti BiH, VSTV)

Branko Zrno informirao je prisutne da je Komisiji do početka održavanja ove sjednice informaciju dostavilo samo Ministarstvo pravde BiH, dok Ministarstvo sigurnosti BiH i Visoko sudsko i tužilačko vijeće BiH to nije učinilo.

S obzirom na ovu činjenicu Zajednička komisija jednoglasno je, sa osam glasova „za“, odlučila da raspravu o ovoj tački također odgodi za narednu sjednicu Komisije.

Ad. 9. Informacija u vezi sa Inicijativom Zajedničke komisije za odbranu i sigurnost BiH s 35. sjednice o pitanjima vezanim za granični prijelaz Klobuk-Zubci /Trebinje/ (sačinio: Uprava za indirektno opreživanje, Vijeće ministara BiH, Ministarstvo sigurnosti BiH, Granična policija BiH)

Slobodan Šaraba naveo je da je bio inicijator za dostavljanje ove informacije, te da mu na osnovu dostavljene Informacije UIO mnoge stvari koje su u njoj prikazane nisu jasne. U tom smislu naglasio je da mu je nelogično da se na udaljenosti od samo 50 metara od postojećeg graničnog prijelaza na Zupcima gradi novi granični prijelaz, kao i činjenica da se ne gradi granični prijelaz Ivanica, koji je u jako lošem stanju. Rekao je da ne može prihvatiti dio informacije

kojim se navodi da nijedna strana nije iskazala interes o zajedničkoj lokaciji na jednom od ova dva granična prijelaza sa Crnom Gorom. Istakao je da mu nije jasno kako UIO isključivo odlučuje po svojoj volji. U tom smislu mišljenja je da je postojeće zakonsko rješenje očigledno loše, te naveo da bi trebalo tražiti odgovarajuće ispravke. Zato je predložio da Zajednička komisija zatraži od UIO dodatna pojašnjenja u vezi sa spornim pitanjima vezanim za granične prijelaze iznesene u drugom dijelu ove informacije.

Mirko Okolić je dostavljanje ovako šture informacije od UIO ocijenio, u najmanju ruku, nekorektnim odnosom ove institucije prema Zajedničkoj komisiji. Ukazujući na posljednja dva pasusa u ovoj informaciji, ocijenio je da ona nije dobra i zaključio da se iz nje može zaključiti da niko od nadležnih tijela ništa ne radi po pitanju rješavanja ovog problema.

Adem Huskić naveo je da je mišljenja da Komisija treba uputiti urgentni dopis prvenstveno Vijeću ministara BiH za dostavljanje informacije koja će dati odgovore na navedena pitanja.

Vinko Dumančić naveo je da je Granična policija dobila zaključak Zajedničke komisije kojim se traži dostavljanje informacije u vezi s pomenutim graničnim prijelazom. Granična policija sačinila je odgovor i uputila ga Ministarstvu sigurnosti BiH. Nadalje je naveo da nema nikakve zapreke po pitanju ovih graničnih prijelaza kada je Granična policija u pitanju. Prave adrese za davanje odgovora na ovo pitanje su Vijeće ministara BiH, UIO i Komisija za integrirano upravljanje granicom. Zaključio je da je GPBiH saglasna da se izgradi zajednički prijelaz sa Crnom Gorom.

Nakon rasprave, Zajednička komisija odlučila je od Vijeća ministara BiH ponovo zatražiti dostavljanje Informacije, a najkasnije do 1. 6. 2009., kako bi se na narednoj sjednici ponovo moglo raspravljati o ovom pitanju.

Ad. 10. a) Dopis Ambasade IR Irana u BiH u vezi s djelovanjem terorističke organizacije;

b) Informacija o održanom sastanku s gosp. Ali Nasserom Sobhanipourom, zamjenikom ambasadora IR Iran, održanom 8. 5. 2009.

Branko Zrno istakao je da dopis Ambasade IR Iran predstavlja informaciju o skidanju terorističke organizacije MKO „Narodni borci“ s liste terorističkih organizacija od strane Evropske unije, iako ona nije skinuta s liste koju vode SAD. Iz sastanka s gosp. Ali Nasserom Sobhanipourom, prilikom kojeg je on izrazio bojazan za sigurnost Ambasade IR Iran u BiH nakon skidanja s liste EU ove terorističke organizacije i njenog eventualnog preseljenja na tlo Evrope, može se izvući zaključak da Ambasada IR Iran u BiH nije zadovoljna postojećim stepenom zaštite. Stoga je predložio da Zajednička komisija ovu informaciju proslijedi Ministarstvu sigurnosti BiH i da od njih dobije informaciju o preduzetim, odnosno nepreduzetim mjerama sigurnosti.

Šefik Džaferović zaključio je da Ambasada IR Iran ovim dopisom upoznaje Zajedničku komisiju sa činjenicom da je Evropska unija skinula navedenu terorističku organizaciju s liste terorističkih organizacija, a da Ambasada smatra da postoji opasnost za jedan ovakav potez EU.

Jozo Križanović naveo je da je ovo pitanje više u nadležnosti OSA-e, nego ove komisije, te se saglasio da Komisija treba ovaj dopis proslijediti Ministarstvu sigurnosti BiH i tražiti od njih informaciju iz koje će saznati na osnovu čega se ova ambasada osjeća nedovoljno zaštićenom. Obaveza Zajedničke komisije je i da svojim djelovanjem osigura njihovu maksimalnu sigurnost u BiH.

Ivo Miro Jović saglasio se da dopis Ambasade IR Iran, zajedno s Informacijom o održanom sastanku sa zamjenikom ambasadora, treba proslijediti Ministarstvu sigurnosti BiH. S druge strane, Zajednička komisija bi o ovom problemu trebala upoznati i Ministarstvo vanjskih poslova BiH. Zaključio je da se Ambasada IR Iran ispravno obratila ovoj komisiji, kao komisiji zaduženoj za nadzor nad sigurnosnim sektorom.

Mirko Okolić je također zaključio da je ambasada IR Iran s pravom tražila sastanak s članovima Zajedničke komisije jer su procijenili da im je lična sigurnost ugrožena, te podržao prijedlog da se materijal koji je prosljeđen Komisiji, zajedno s Informacijom o održanom sastanku, osim Ministarstvu vanjskih poslova BiH i Ministarstvu sigurnosti BiH, proslijedi i Predsjedništvu BiH, s obzirom da i je ova institucija nadležna za međunarodnu saradnju.

Nakon rasprave, Zajednička komisija primila je k znanju Informaciju o održanom sastanku s gosp. Ali Nasserom Sobhanipourom, zamjenikom ambasadora IR Iran, održanog 8. 5. 2009., te zaključila da ovu informaciju, zajedno s dopisom Ambasade IR Irana u BiH u vezi s djelovanjem terorističke organizacije MKO „Narodni borci“, prosljedi Predsjedništvu BiH, Ministarstvu sigurnosti BiH i Ministarstvu vanjskih poslova BiH, prvenstveno radi informiranja ovih institucija i eventualnog preduzimanja odgovarajućih radnji iz njihove nadležnosti.

Ad. 11. Tekuća pitanja:

- a) Informacija o održanom 70. NATO Rose-Roth seminaru, Sarajevo, od 19. do 21.3.2009.**

Zajednička komisija primila je k znanju Informaciju o održanom 70. NATO Rose-Roth seminaru.

- b) Izvještaj s parlamentarnog seminara „Vize i upravljanje granicama“, 31.3. i 1.4.2009., Brisel**

Zajednička komisija jednoglasno je usvojila Izvještaj s parlamentarnog seminara „Vize i upravljanje granicama“, održanog u Briselu 31.3. i 1.4.2009.

- c) Informacija o učešću u programu „NATO Tour“, Brisel, od 19. do 23.2009.**

Zajednička komisija primila je k znanju Informaciju o učešću u programu „NATO Tour“.

- d) Poziv za učešće na Konferenciji parlamentarnih tijela za nadzor nad radom obavještajno-sigurnosnih službi Jugoistočne Evrope, od 25. do 27.5.2009., Sarajevo**

Članovi Komisije odlučili su predložiti kolegijima domova PSBiH da donesu odluku da na ovoj konferenciji, u ime Zajedničke komisije, učestvuje Slobodan Šaraba, zamjenik predsjedavajućeg Komisije

- e) Poziv Misije OSCE-a u BiH za učešće na „Strateškom vojno-političkom seminaru“, od 12. do 16.10.2009., Sarajevo**

Članovi Komisije odlučili su predložiti kolegijima domova PSBiH da donesu odluku da na ovoj konferenciji, u ime Zajedničke komisije, učestvuju Branko Zrno i Adem Huskić.

- f) Molba OSCE-a i Ministarstva sigurnosti BiH za organiziranjem prezentacije rada Zajedničke komisije za odbranu i sigurnost BiH učesnicima kursa u oblasti Sigurnosne politike BiH, 19.5.2009., Sarajevo**

Članovi Komisije odlučili su da rad Zajedničke komisije za odbranu i sigurnost BiH učesnicima kursa u oblasti „Sigurnosne politike BiH“ prezentiraju Branko Zrno, predsjedavajući Zajedničke komisije, i Željko Grubešić, stručni savjetnik.

- g) Poziv za Treći seminar Vojnoobavještajnog roda OS BiH „Asimetrične prijetnje Balkanu“, Sarajevo, od 25. do 28. 5. 2009.**

Zajednička komisija odlučila je da, zbog ranije preuzetih obaveza, niko od njenih predstavnika ne može prisustvovati Seminaru Vojnoobavještajnog roda OSBiH „Asimetrične prijetnje Balkanu“.

h) Prijedlog za informiranje Zajedničke komisije o učestvovanju pripadnika OSBiH u vojnim vježbama NATO-a , s posebnim osvrtom na vojne vježbe u Gruziji

Slobodan Šaraba predložio je Zajedničkoj komisiji da od Ministarstva odbrane BiH zatraži u što kraćem roku, a najkasnije do 1. 6. 2009., dostavljanje cjelovite Informacije o učešću pripadnika OSBiH u vojnim vježbama NATO-a, s posebnim osvrtom na vojne vježbe u Gruziji, počev od juna 2008. pa do danas.“

Članovi Zajedničke komisije jednoglasno su usvojili predloženi zaključak.

Zapisnik sačinila
Dragica Hinić

Predsjedavajući
Zajedničke komisije
Branko Zrno